

知足齋文集
二



叢書集成

初編

主編者
王雲五

商務印書館發行

王雲五主編

叢書集成初編

知 足 齋 文 集
二 冊

中華民國二十五年六月初版

著 者 朱 珪

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

大

一三四八上

(本書校對者朱廣福)

集

知足齋文集卷第四

墓誌銘

呂君慕堂墓誌銘

呂君慕堂。卒於乾隆二十年乙亥。越二十一年丙申。其孤麟。乃卜地葬君於長新店之西。又十年丙午。君配吾姊氏卒。麟將啓君之阡而合葬焉。泣而請於珪曰。麟生未晬而孤。及有知。竊聞吾父之生平。惟舅簡河公所作行略及吾母口述耳。比葬未有銘。吾母之喪。舅既爲之狀。茲合祔有期。敢請舅銘以不朽。吾父母也。君諱元龍。字麟洲。一字慕堂。順天大興人。其先世自河南遷京師。明末有名相者。官千戶。甲申之變。守永定城門。死之。有卒持其殘骨。至東便門外。瘞之舍中。遂墳焉。爲君七世祖。五傳至君。考琬。官太常寺典簿。妣楊宜人。生君。君少嗜讀書。旣爲諸生。念先世未嘗以科第起家。必欲得之。以慰父母心。刻苦勤學。爲文章。深沈寡默。窺江右羅文止章大力之奧窔。嘗斲木度棘。闢矮屋尺寸。坐其中。呻吟。夜以繼日。乾隆庚午。遂以第八人舉於鄉。再會試。不售。嘔血而罷。遂病。病二歲而卒。妻朱氏。爲先考資政公先妣徐夫人所生第二女。與君同志相勸。以日者推姑干支。歲行在某。不利於壽。憂之形於夢寐。若躬禱於都城隍所。請減己年。以益姑算。覺而屬珪爲文。焚於廟中。及君病。誓以身代。病亟矣。欲先死之。吞金約指二。旋下乙

亥正月三日。君病彌留。家人益防之。十六日向明。竟投縊於戶上樞。人覺而解其懸。氣不絕如縷。越日而蘇。咸責以事親撫孤大義。領之乃稍復常。事舅姑皆以壽終。教子麟。以諸生考職主簿。鄉人上其事於學。大吏以節孝請旌。得旨。呂朱氏准其建坊入祠。今年正月六日。以疾卒。君生於雍正三年乙巳四月二十三日午時。年三十有一。孺人生於雍正四年丙午四月二十日巳時。年六十有一。子一麟。娶胡氏。繼娶李氏。女五。既嫁者二。一適戊子科舉人分發山東知縣天津沈以顯。一適候選州同通州劉錫光。皆卒。其耐也。負庚面甲。兼卯酉分。爲乾隆五十一年四月十二日酉時。銘曰。勤學不壽。其益不朽。苦貞不享。厥光鬱上。儷於藏孔。長庇其根。以昌。

敕封儒林郎邵翁墓誌銘

編修邵君瑛。將奔其封翁景載先生之喪。持所爲行述泣示珪。而請爲銘。珪辭不獲。且知先生之勤學教子者。不可沒也。先生諱陞陞。字梅林。一字景載。浙之餘姚人。曾祖以文。祖籲俊。本生祖三俊。父思慈。世爲縣學生。思慈能文。年逾四十而卒。時先生生甫四十日。初。先生之娠也。生母張夢月入懷。及是。母子暨張兩嫠。抱數旬之孤。承兩世之重。不絕如髮。比長。受業同邑黃敬菴之門。本洛閩學而飾之以經義。史志所讀書必經手錄。而識各家疏解。於上方旁行皆徧。年二十有三。入學爲諸生。旋丁嫡母憂。屢不就試。歲丙子。舉於鄉。不肖違生母養。嘗一上公車。不第歸。遂授經於里。訖不出。其學尤長於經。如釋周禮樂師舞。引春秋初獻六羽。駁鄭注宗廟以人之說。据學記三王祭川。先河後海。公羊傳三望祭泰山河海。駁大宗伯

賈疏禮無祭海之說。据周禮夏官羊人。凡釁積共其羊牲。牛人無其文。證孟子釁鐘本用羊不用牛之義。貫串而折其中。其大略也。子瑛。玠皆秉其所口授。故瑛最精於樸學。甲辰會試。以第三場對策核瞻得雋。殿試。玠與讀卷官奇其策典實而茂蔚。徧示諸公。皆以爲異等。擬進上覽而嘉之。以誤書一字。置一甲第二名。人以爲先生之德業不大鳴於身而昌其子也。傳者或云。先生教子甚嚴。幾於過情。玠閒嘗詢之瑛。瑛肅然曰。瑛父嚴而實慈。瑛自幼體弱。凡飲食藥物。父必手檢而詔之曰。吾非爲汝。爲汝大父母也。大父四十年苦學。大母六十餘年苦節。而汝不自愛自力耶。玠乃益歎先生之孝也。於是恭遇乾隆五十年覃恩。瑛請以己官貤贈祖考。階儒林郎。妣于生妣張。皆安人。先生善事其母張太安人。年八十有七。有孺子之慕。生平儉於己。而嗜義若渴。族有孀婦某。貧而有志。周之二十餘年。以成其節。先生生於康熙五十五年丙申十一月十八日戌時。卒於乾隆五十一年丙午二月二十九日亥時。年七十有一。丙子科舉人。敕封儒林郎。翰林院編修。加一級。配朱安人。先卒。繼室俞安人。子二。瑛。庚子科舉人。甲辰科進士。及第。翰林院編修。加一級。三通館纂修官。娶俞氏。玠貢生。娶方氏。女子二。一適縣學生谷鶴。一適太學生朱起齡。孫六。器之。習之用之。瑛出。牧之。進之。立之。玠出。女孫四。某年月日葬於某。銘曰。考菑畚。子滿車。孝廉竭。暨昌汝閭。曰馮陽。闕生喬如。康節伯溫。世厥家。

章淳菴墓誌銘

歸安章子芑。聞其本生祖淳菴府君之赴哀甚。泣而請於玠曰。吾祖行敦德於躬。施惠於族黨。潛曜習爽。

毫釐不倦。非公曷闡於不朽。予習知章子之誠篤。非阿其親者。案狀。府君諱通翰。字蓴懷。號淳菴。其先自會稽遷歸安之荻岡邨家焉。父諱縉勳。有子五人。府君之兄曰靜園。仲韶。弟曰呂涯。碧軒。父善病。府君侍起居最謹。年十八喪父。以家計支絀。遠賈於閩粵。暨楚南北。歲饑。買米平糶。乃獲倍息。歸之於兄。無私蓄。弟呂涯卒。遺孤五。撫之若己子。所居鬱攸。府君有別業。不肯獨遷。曰。如孤姪何。兄靜園卒。屬其子西庚於府君。西庚又卒。覆翼其孤。迄於成立。曰。吾懼無以見吾兄於九原也。兄仲韶卒。無子。以長子某爲之後。勤學不祿。實生岑。乾隆癸卯科舉人。繕書四庫館。議敘知縣。克秉府君之教。以道自淑。府君晚而好道。孜孜於善。周人之緩急。病予之藥。死則施之棺。助窆。自奉褐衣疏食而已。齒雖耄。凡祠墓事必躬親。乾隆五十一年丙午正月十三日卒。年八十有一。嗚乎。可謂施期稱道不亂者歟。生於康熙四十五年丙戌六月二十二日。太學生妻朱氏。兵部主事泮功女。子三。女二。孫十二。曾孫十二。某年月日葬於某。銘曰。歐餘崩。餘不泚泚。鬱霞流英。津其根莖。以擊爾佳城。

太學生黃存菴墓誌銘

歲辛丑。予案郡邵武。試古學。有建寧黃宗健。能爲五七古數十韻。遂首取之。明年科試。復擢冠其學。補廩生。送入鼇峯書院肄業。予使旋。甲辰。宗健奉其父存菴之命。就學於京師。入太學。今年七月。宗健聞父喪。慟絕曰。吾乃以學遺其親。予憐而解之曰。此昌黎爲歐陽生言之矣。生豈可致毀以重死其父乎。於是宗健稽顙泣請曰。死無以報吾父。惟吾師哀而銘之。則死且不朽。君諱岡。字東壁。號存菴。考諱孫香之次子。

出後其弟孫安。孫安沒。其妻彭。年二十有七。矢志撫孤。卒年六十有六。守節四十年。君養其志。終身無間焉。君少讀書。有聲於庠。會同里某斫其族山宰木。族人亦斫某之山木以報。訟於縣。縣察其情。不直某。某資緣於郡。郡以縣訊不平。勘之。君本生父將爲獄首。禍不測。君奮然曰。兒當之。遂挺身投吏。吏案牘叱曰。牘首名孫香。汝何爲者。君曰。此吾父也。父實老病。不能斫某木。木固岡斫之。願伏罪。吏大恚。詈曰。汝以衿不畏死耶。君曰。死甘之。畏吾不來矣。遂褫衿就繫。孫香以免。獄既具。於是桂林陳文恭公撫閩。平反之。釋君歸。母彭喜而泣曰。不意吾母子生相見也。君於是入貲爲太學生。閉戶不出。惟嚴課其二子曰。庶一雪我恥。長子宗修。先入學。從其鄉朱梅崖先生肄業於鼇峯書院。梅崖引以爲可與言。而爲君作六十壽序。宗健復耆學進取。觀其兄弟之征邁不已。以期無忝所生者。可以知君之教矣。君卒於乾隆五十一年丙午四月七日。生於康熙五十三年甲午六月八日。年七十有三。妻鄧。先卒。子二。宗修。宗健。女子二。孫五。尚譜。尚訥。尚識。長吉。長慕。某年月日。葬於某。銘曰。

代父叢棘。非其愎。貽子學殖。非其得。火傳薪熄。後將食爾德。

太子少傅經筵講官東閣大學士兼戶部尚書贈太子太保諡文定梁公墓誌銘

乾隆丁未秋八月。大學士梁文定公之喪。歸於浙。適珪將案試湖州。遇之於塘西。旣哭公於舟。其孤以公年譜泣而請銘。珪不獲辭。案梁本羸姓。其先出於伯翳。由新昌而遷於豐山之梁巷邨者。曰國鎮公。稱東梁。至公十有七世。爲會稽人。曾祖諱廷仁。祖諱一能。考諱文標。官刑部陝西司主事。後皆以公貴。累誥贈。

如公官。妣陳太夫人。初。公考官刑部司獄。恤囚有陰德。曰。彼自麗於法耳。何爲瘼苦之下。獄者皆德梁君。已而生公。諱國治。字階平。號瑤峯。有兄國泰。早卒。事嫂馮甚謹。官戶部侍郎時。以己官貤封焉。公年十歲。居陳太夫人喪。如成人。十四。以制義書法見賞於學使崔公紀。籍順天通州。入學第一人。十七。丁外艱。十九。舉乾隆辛酉科鄉試。明年。考取內閣中書。改歸本籍。戊辰會試中式。殿試一甲第一名。賜進士及第。授職修撰。珪登公榜。同爲翰林官。未幾。以繼母吳太夫人憂歸。乾隆十六年。散館。十九年。遷國子監司業。二十一年。充丙子科廣東正考官。復命。奏對稱旨。命往廣東。以道員用。明年。補惠潮嘉兵備道。二十六年。恭祝皇太后萬壽至京。以卓異引見。特旨署都察院左副都御史。公以巍科清望。出試吏事。至是。超擢卿貳。聞者翕然。明年。主壬午科江西鄉試。旋視學安徽。擢吏部左侍郎。三十年。調江蘇學政。提唱羣雅。鑑別茂異。江南北士蔚然宗之。會以署廣東糧道。失察折色事牽連。落職就勘。明年事白。授山西冀寧道。三十二年。授湖南按察使。時珪司臬湖北。公道經武昌。登蛇山巔。浮白談契闊。終日不及塵瑣事。三十三年。授江寧布政使。明年。擢湖北巡撫。兼署湖廣總督及荊州將軍印。是時官兵征緬甸。振旅過境。公躬勞拊。且鎮之。序行無譁。奏定施南府屬宣恩來鳳咸豐利川學。增額有差。三十六年。調湖南巡撫。公以經術勤吏治。清風惠氣。不燒以孚。三十八年。特旨內召直軍機處。署禮部侍郎。珪致書於公曰。閣下以封疆大吏入贊密勿。願以清吏源。培民脈。端士氣。三言爲獻。公不以予爲迂也。三十九年。命直南書房。補戶部侍郎。自是召對扈從。無閒昕夙。充經筵講官。賜紫禁城騎馬。第宅冠服之賚。便蕃有加。四十二年。典順天鄉試。擢戶

部尙書四十七年。加太子少傅。明年。以原官協辦大學士。歲庚子甲辰。再以扈駕南巡。賜假省墓。鄉黨榮焉。五十年。與千叟宴於乾清宮殿上。夏。授東閣大學士兼戶部尙書。公以文學受知。在帝左右。敬慎縝密。寵利不居。潔躬冲度。粹然儒者。在昔有宋。龍首入黃扉者九人。有明一代之十有七人。而我皇臨御五十餘年以來。遘其三焉。公躬際文德武功之盛。雍容大雅。退食澹淡。有不愧讀書宰相者。其天性學養。皆不可及也。公體素清癯。五十一年仲冬望日。疾作。上遣醫官暨侍衛傳旨存問。越月十三日壬子。考終。奏聞。上軫悼。晉贈太子太保。命皇子往奠。賚白金千兩治喪。賜諡文定。公始終承眷。惟其端醇勤慎。信之者深也。詩文著錄若干卷。彙藏於家。配徐夫人。生一子。和凝。先卒。筮唐孺人。生子五。承輿。議敘州同。爲世父後卒。承雲。欽賜舉人。承翼。卒。承綸。承福。女幾人。孫幾人。某某。公生於雍正癸卯年十月二十一日卯時。終於乾隆丙午年十二月十三日巳時。年六十有四。某年月日。葬於紹興南門外乾溪之五台山。銘曰。文曜降斗。麟題鳳苞。守器在廟。天球赤刀。元功無名。大美不佻。當無有用。去來逍遙。芑爾世德。稽山之椒。

顧治齋文學墓誌銘

歲丁未春。太倉顧生張思介。錢少詹辛楣書。謁予於杭。書言生耆學志古。予留館之。佐校歲科兩試。生早夜斷斷著讀書隨筆若干卷。於經史諸家。鉤沈索隱。真能嚼嚙其甘苦者。閒窺其案頭舊書。鉛黃填錯。詫之曰。此何代枕中祕耶。生愀然曰。先子手批也。先子於書無所不治。潛德未曜。思不能表章遺書。惟窻夢之禍。得有道而能文者一言。則思死且不朽。思願執贄爲弟子。珪辭而勉爲之文。案行述。君諱成志。字心

勿號治齋。顧氏族有二。章顧之顧。己姓。吳郡之顧。姒姓。初少康庶子無餘。封於越。暨漢封東海王。搖之子。期視爲顧。余侯子孫以爵爲氏。陳黃門侍郎野王之第二子鴻南。封寧遠侯。十數傳至宋宣和中。有輩者。官於朝。後從南渡。其子深。由光福再遷崑山之新安鄉。爲太倉始祖。十傳至松霞公燕詒。明崇禎戊辰進士。官至浙江右布政使。君之曾祖也。生光復。康熙辛酉科副榜貢生。其子衍。縣學生。康熙中以通奇門算學。供奉內廷。有子六人。君其季也。自襁褓育於西谿張氏。西谿君諱誠。無子。撫君甚慈。君幼有至性。四歲。遭張氏庶妣嚴之喪。稽顙拜客如禮。年二十。以張姓入太倉州學。屢試高等。補增廣生。後以督學嚴查冒姓。乃爲文泣告於張氏祠。誠子孫世世以張爲重名。且自營壙於西溪君墓側。曰。四時祭埽。必兼承二姓。作誡子詩曰。生依死不離。其不負張氏撫育之仁也。與同高祖昆弟行人陳塋。講治心之學。乃自號治齋。爲文章原本經史。不見售於有司。貧無以爲家。晚始卜居西塘。有樹有池。老屋三間。名曰稻香。結西塘吟社。著錄益富。凡十數種。藏於家。考訂之學。宗其族亭林先生。何顧氏之多學者也。君生於康熙五十六年丁酉三月八日。卒於乾隆四十八年癸丑五月十六日。年六十有七。美鬚髯。體中而豐。妻任。生子三。張毓。張思。州學生。張傳。州學生。女子一。適國子生王春。孫五。張森。張姓。張翰。張同。張崑。乾隆五十三年正月十一日葬於古塘北。張氏西溪府君墓左。從君志也。銘曰。

山叟室謀行屋闔。厥父菑田子播。治君家壁立百城。歸虛隔延白脈。望肥顧則異己。經埒章窆楹將大稽古輝。

浙江督糧道陳君墓誌銘

公陳姓諱夢說字象臣又字曉巖絳縣之陳邨人先世自洪洞來遷祖諱元善增生貽贈奉直大夫刑部
安徽司主事加一級祖妣李氏貽贈宜人父諱瑞誥贈中憲大夫禮部精膳司郎中加二級母孫誥贈恭人
奉直公中憲公皆授經於垣曲之劉張邨遂家焉生君於劉張邨其夕母夢明月墮窗前光照一室故名
君曰夢月其後據名不以日月之傳易今名蚤穎著學十歲還家於絳十五同縣李恭人來歸中憲公率
君躬耕田閒且耕且讀書食則觀書於側母呵之曰久不將斜汝目耶夜望見室中鐙火苦禁之君竊以
布帷掩其光遂通諸經年十八喪祖妣李盡哀歲乙卯年二十二入學爲諸生丙辰舉於鄉庚申父母相
繼卒君哭之毀戊辰中會試式出華陽顧庶子汝修房與珪同年同門其撥入本經房師則長洲沈編修
慰祖也殿試賜同進士出身以主事用試刑部河南司君性介不妄與人交晤初或疑其隘久而彌摯尤
勤於守官在部時讞決必比律協情不阿上官意嘗與諸城劉文正公諍五日而卒不易所擬文正公心
韙之歲癸酉補安徽司兼提牢事早晚親行獄役不能爲姦而囚無苦虐少司寇無錫秦公察而嘉之歲
甲戌擢浙江司員外郎乙亥李恭人卒丙子京察一等十月陞禮部精膳司郎中明年四月護送暹羅國
使臣抵粵有入粵紀事戊寅兼儀制司繼娶朱恭人記名御史辛巳以繁缺道府記名六月簡授寧紹台
道未抵任巡撫莊公檄閱紹興宋家漊海塘君議當修復從之癸未台屬寧海上下梅邨有拒捕案提督
將以兵往海旁邨民皆驚竄君謝之輕騎行縣令已縲繫竄者數十人下之獄君曰此非犯者我來捕梅

姓數人而已。駐停旁盡獲之。釋其少子一人。台人謠其事曰存孤記。遂改停旁爲海防同知治所。勸修鄞之錢湖。牘乙酉。上南巡。召見曰。夢說爲刑曹。素知其能。賜綺貂。是年八月。天台水。勸賑之。明年。以所屬諸暨令不職。里吏議送部引見。仍以道員用。撫臣奏請督修浙城工。丁亥。特旨授浙江督糧道。卻餽金。漕政肅然。戊子。有譏言翦髮事。蕭山捕得僧了凡等四人。誣服君平反之。明年。或言事起於浙。以犯解京。訊無他。而抵捕者罪。君以輕比。議降一級。修餘杭南湖隄。填其潭。署嘉興府。嘉興訟。君釐之無留牘。壬辰。署嚴衢處湖各府事。甲午。復元官。君在浙十二年。有歸田志。遂自號西崦。劇夫請假歸。明年。卜居山泉之旁。號枕泉居士。戴笠芒屨。與鄉里道舊故。優游林居者十年。甲辰。示疾。考終。生於康熙五十三年甲午七月十二日子時。卒於乾隆四十九年甲辰十一月晦日午時。年七十有一。元配李恭人。勤儉仁恕。中外稱賢。子四。鍾雲。國子監生。鍾霞。貢生。皆恭人出。先卒。鍾雨。側室唐出。鍾雯。側室戴出。女子三。孫二。鍾霞生毓寧。爲鍾雲後。鍾雨生毓揚。爲鍾霞後。曾孫一道瞻。君仕優好學。所著各集。彙藏於家。葬於某原。其孤寄書於珪曰。先公同年之在朝者。惟公歸然獨存。敢乞銘。銘曰。

君面冷而中慤。交久孚而情泊。周紀於浙聲濯濯。十年枕流絳居樂。我文非樊璞可琢。

致仕鎮守雲南楚姚蒙景等處地方總兵官世襲三等子誥贈振威大夫浙江提督陳公墓誌銘

乾隆丁未春。珪案試寧波。識提督陳公。公儒將也。試畢。偕予會食。坐未半。聞母李太夫人有恙。蹶蹶不能終食。予心隨其孝。明年春。予以科試再至寧波。而公已居憂。泣告於珪曰。大用早孤。賴兩母夫人扶先公。

樞殯於京師。暨大用待罪登州。遭繼母惠太夫人喪。將歸合葬於寧夏。次西安。聞石峯堡回不靖。誼當執戈。乃卜葬於長安城南之沈家橋。以待命。未暇勒石也。今生母李太夫人見背。行將祔於陝。敢請銘。案家傳。陳本江寧人。其上世不可考。曰明德生孝。孝生尙智。明末官榆林副總兵。與流賊戰。死之。葬寧夏。遂籍延綏。是生忠愍公諱福。國初以武舉起家。歷官至夔州副將。擢寧夏總兵。是時吳三桂反。王輔臣據平涼。公家屬猶留重慶。三桂質而招之。三斬其使以聞。聖祖嘉其忠。授陝西提督。平花馬池。進攻固原。降卒潰。遇害。特贈公爵。世襲三等子。例傳九世。以其弟壽之子世怡襲。蜀平。壽入川。求得公妻黃子世琳於山中。世琳襲爵。官至古北鎮總兵官。入爲鑾儀使。是爲爾謙公之考妣。錢太夫人。公諱益。爾謙其字也。襲爵三等子。雍正八年。以侍衛授直隸固關營參將。出征北路鄂爾坤。乾隆八年。授福建延平協副將。擢雲南楚姚蒙景鎮總兵官。以疾致仕。行抵長沙。卒於館。有子大用尙幼。乾隆二十八年襲爵。今官至浙江提督。初公娶高夫人。雍正十三年卒。時公方有事於北路。殯夫人於寧夏地震。遂改葬焉。繼室曰惠夫人。生女一側室曰李夫人。生大用。夫人清苑人。兩夫人賢。克撫孤。以長以教。底於大成。大用不知其孰爲所生也。大用既貴。疊遇覃恩。兩夫人皆誥封子爵一品太夫人。孫三均坊壩。公生於某年月日。終於某年月日。年若干歲。惠太夫人生於某年月日。終於某年月日。年若干歲。李太夫人生於雍正丁未年七月二十六日。終於乾隆戊申年二月四日。年六十有四。先是大用既合葬公暨惠太夫人於長安。旋拜提督浙江之命。入覲。以寄葬父母於陝。故陳奏上曰。陝甘一省。無不可也。某年月日。祔葬李太夫人於公墓。銘曰。

公侯之孫忠孝家。大江西溯河流。遐長安。每每麟辟邪。松根伏苓藏孔佳。

宗人府府丞曹公墓誌銘

珪聞慕堂先生之赴。既悲老成同志之凋謝。而編修錫齡昆季。以書來請爲誌銘。珪不得辭。公曹姓。諱學閔。字孝如。慕堂其號也。山西汾陽人。曾祖復琦。祖應璽。父曰英。皆以公貴。誥贈中議大夫太僕寺少卿加一級。曾祖妣靳。祖妣司樊。母王。皆誥贈淑人。兄弟四人。公居次三。友於兄弟。命錫齡以其官。貤贈兄學曾爲翰林院庶吉士。又貤贈兄學思爲翰林院編修。命祝齡爲弟學雍後。公幼多奇兆。乾隆六年辛酉。舉於鄉。會試報罷。游江浙名山水。歸而設教里中。勵志講學。甲戌成進士。改庶吉士。庚辰散館。授檢討。充武英殿功臣館纂修官。辦翰林院事。二十九年。授河南道監察御史。三十三年。遷刑科給事中。歷巡視西南北城。己丑。充會試同考官。三十五年。轉吏科掌印給事中。公爲言官。條奏事皆體要。可施行。三十七年。授光祿寺少卿。明年。遷通政使司參議。擢太僕寺少卿。甲午。充順天鄉試同考官。四十一年。稽察右翼覺羅學。四十四年。以復申舉人會試。請由州縣達部。摺部議降三級。四十五年。補鴻臚寺少卿。前後扈駕熱河。召見垂詢。上知公樸誠也。四十八年。遷內閣侍讀學士。甲辰。充武會試同考官。先是公爲御史。上言宜考古制。建辟廱於國子監。部議未行。至是會天子將臨雍。發睿思。命大臣規濬園水。禮樂備舉。上憶及前奏。特旨嘉獎。曹學閔能獨抒所見。其建白亦不可沒。有缺卽請旨陞用。眞異數也。五十年正月。預乾清宮千叟宴。恩賜便蕃。五十一年正月。超擢宗人府府丞。復命稽察右翼覺羅學。是時公子錫齡在翰林有聲。方督

學雲南。祝齡孝廉侍左右。初公起家寒素。以開濟自許。與人交。上下剛柔動靜。無所不當。時地利病。口辨手畫。井井有條目。可措置。雖富貴。儉約如諸生。及年過六旬。反而講求性命之學。泊然宵默。幾於靜得。公與先兄竹君同年進士。與珪同館。居同巷。晚而交益摯。每深夕來。危坐相對。閒則邀予至其齋。疏食清談。蓋不愧素心晨夕者。孳孳爲善不倦。修山右三忠祠。宣武門外椒山先生故宅祠。及三晉會館。南新門外義園。永定門外掩骼會。皆躬親襄舉。擘畫可垂久。性既恬淡。官宗丞之年十月。以上氣疾。奏請解任調理。奉旨准以原品休致。明年春。錫齡自滇歸。公僦道士院。課孫養性。手書寄珪。猶以精進相勸。所著詩文彙藏於家。晚作多心得。近道者。是冬感風寒疾。端坐而逝。蓋乾隆五十二年丁未十二月八日丑時也。生於康熙五十八年己亥十二月十三日子時。年六十有九。配同縣任淑人。白首相賓。有內則子五。成者二。錫齡。乾隆乙未進士。翰林院編修。記名御史。祝齡。庚寅舉人。議敘知縣。爲叔父後。孫八。汝淳。汝欄。汝淵。汝沆。汝洵。汝涵。汝藻。汝淳。女一。女孫五。某年月日。葬於某所。銘曰。

木之材爲杗爲舟。木之神宜山宜邱。材於人乎有益而無害。神反其天乎與造物者遊。是一非二。吾以咨莊周。

鄭敬夫墓誌銘

蕭山鄭君豹文。館予冠山伯兄家。閒借予插架通志堂經解。日夜手鈔不輟。予心嘉其耆學之勤也。聞其尊人敬夫先生。病而好學。齋志以殫。其母吳孺人。教其子尤切。君旣發科而有志於古。蓋能善體親志者。

已而聞赴歸。將合葬其父母。而泣請予爲銘。曰。不孝不獲顯揚表彰吾親。然得立言之君子爲闡其幽光。則是吾親可不朽於九原。而不孝之罪稍釋。君鄭姓。諱崇禮。字敬夫。其先由遂安遷蕭山。居城中曰鄭家街。父斯美。貲贈修職郎山東兗州府經歷。母沈孺人。生子三。君其長也。幼讀書。患痰喘疾。及壯而劇。閒旬日則發。發卽上氣不得息。旣喪二親。孺慕夢中嘗呼父母不絕聲。妻吳氏同縣人。善事夫子。調養其疾病無怠。有子三。而督其次子豹文讀書。以繼父志。先生年五十而卒。卒後十八年而豹文舉於鄉。其母曰。汝父不獲見汝之捷。然汝無以是爲足慰汝父也。汝家先人東明公所著見聞日錄。嘉言懿行具在。汝以是爲師。則足以慰汝親矣。豹文識之不敢忘。又十年而吳孺人以疾終。年七十有五。先生生於康熙五十二年六月四日午時。卒於乾隆二十五年二月二日辰時。孺人生於康熙五十一年十月二十九日戌時。卒於乾隆五十一年八月十一日子時。子嘉謨。江西大庾縣小溪驛驛丞。豹文。乾隆丁酉科舉人。樂武。先卒。女二。孫四。耀宗。嶽宗。敦宗。聯宗。孫女六。某年月日合葬於某。銘曰。寧移山而增塋。毋掘苗而本厯。鄭君有後。勤斲砭。爲菑爲畚。興也勃。有。如不信。視此碣。

武定府知府徐君墓誌銘

君諱觀孫。字用賓。號雪崖。徐姓。初自越北遷京師。爲宛平人。家於天津。考諱某。候選州同。贈朝議大夫。君其長子也。年十四。妣王恭人卒。十八入府學。廿七舉雍正乙卯科鄉試。乾隆八年。以知縣揀發廣東。借補電茂場鹽課大使。充癸酉科鄉試同考官。任滿舉最。丁父及繼妣胡恭人憂。服除。廿五年補廣西恭城縣。